

Na osnovu člana 16. stav (1) i člana 17. stav (1) Zakona o Vladi Hercegovačko-neretvanskog kantona („Službene novine HNK“, broj: 3/07 i 5/09) i člana 18. Zakona o dopunskim pravima branilaca i članova njihovih porodica u Hercegovačko-neretvanskom kantonu („Službene novine HNK“, broj: 6/18, 4/21, 7/22 i 11/23), na prijedlog Ministarstva za pitanja boraca, Vlada Hercegovačko-neretvanskog kantona je na sjednici, donijela

UREDBU

O JEDINSTVENIM KRITERIJIMA I PRAVILIMA ZA ZAPOSŁJAVANJE BRANILACA I ČLANOVA NJIHOVIH PORODICA U HERCEGOVAČKO-NERETVANSKOM KANTONU

(neslužbeni pročišćeni tekst na dan 26.05.2026. godine)

1/24

5/25

6/26

POGLAVLJE I. OSNOVNE ODREDBE

Član 1.

(Predmet Uredbe)

(1) Ovom Uredbom propisuje se postupak primjene člana 18. Zakona o dopunskim pravima branilaca i članova njihovih porodica u Hercegovačko-neretvanskom kantonu („Službene novine HNK“, broj : 6/18,4/21, 7/22 i 11/23) (u daljnjem tekstu: Zakon) pri zapošljavanju branilaca i članova njihovih porodica u Hercegovačko-neretvanskom kantonu (u daljnjem tekstu: Kanton).

(2) Postupak primjene prioriteta pri zapošljavanju iz stava (1) ovog člana primjenjuje se u svim postupcima prijema u radni odnos u kantonalnim organima uprave, kantonalnim upravnim organizacijama, **jedinica lokalne samouprave**, kao i u svim pravnim licima čiji je osnivač Kanton, jedinica lokalne samouprave, odnosno koje se finansiraju iz Budžeta istih sa učešćem od najmanje 25%.

Član 2.

(Rodna neutralnost izraza)

Izrazi koji se koriste u ovoj Uredbi, a imaju rodno značenje koriste se neutralno i odnose se jednako na muški i ženski rod.

Član 3.

(Korisnici prava)

(1) Pod braniocima i članovima njihovih porodica podrazumijevaju se lica iz člana 1. Zakona, bez obzira na godine života dok ispunjavaju zakonom predviđene uslove za rad.

(2) Korisnici prava iz stava (1) ovog člana su:

- a) članovi porodice poginulih, umrlih, nestalih branilaca,
- b) ratni vojni invalidi,
- c) dobitnici ratnih priznanja i odlikovanja,

d) demobilisani branioći.

(3) Korisnici prava su djeca i supružnici lica iz stava (2) tačka b), c) i d) ovog člana.

(4) Korisnici prava po ovoj Uredbi su lica iz stava (1),(2) i (3) ovog člana koji imaju prijavljeno prebivalište u Kantonu i najmanje pet godina prije objave konkursa na koji se prijavljuje.

POGLAVLJE II. KRITERIJI ZA VREDNOVANJE

Član 4.

(Prioritet pri zapošljavanju)

(1) Lica iz člana 3. ove Uredbe imaju pravo na prvenstvo prilikom prvog zapošljavanja u stečenoj stručnoj spremi, koje pravo prestaje ukoliko radni odnos na osnovu takvog zapošljavanja postane radni odnos na neodređeno vrijeme.

(2) Lica iz stava (1) ovog člana prvenstvo pri zapošljavanju ostvaruju samo ukoliko ispunjavaju opće i posebne uslove za radno mjesto na koje se vrši zapošljavanje, u skladu sa kriterijima utvrđenim općim aktom poslodavca i uslovima ove Uredbe, a koja su se našla na Listi/Popisu uspješnih kandidata.

(3) Pravna lica utvrđena članom 1. ove Uredbe obavezna su pored općih i posebnih uslova iz stava (2) ovog člana, kao jedan od obaveznih kriterija propisati poštivanje kriterija i vrednovanja iz ove Uredbe.

(4) Pravna lica utvrđena članom 1. ove Uredbe obavezne su prilikom raspisivanja konkursa kao dokaz o ispunjavanju uslova tražiti dostavljanje dokumentacije koja je propisana u prilogu 1. ove Uredbe i čini njen sastavni dio.

Član 5.

(Vrednovanje)

(1) Utvrđivanje prioriteta iz ove Uredbe vrši se na način da se licu iz člana 3. stav (1), (2) i (3) ove Uredbe bodovanjem ostvarenim na osnovu općih i posebnih kriterija, nakon provedene kompletne procedure testiranja uključujući i intervju, a koje se nađe na Listi/Popisu uspješnih kandidata, na ukupan broj tako ostvarenih bodova, u zavisnosti o pripadnosti branilačkoj populaciji dodaju dodatni bodovi primjenom postotka u tabelarnom prikazu, i to za:

R.b	Branilački status	Postotak
1.	Dijete poginulog, umrlog, nestalog branioca bez oba roditelja	40%
2.	Dijete poginulog, umrlog, nestalog branioca	25%
3.	Supružnik poginulog, umrlog i nestalog branioca	20%
4.	Lica u statusu ratnog vojnog invalida od X grupe kao i njegovi supružnici i djeca:	15,5 – 18,2 %

	15,5 % + 0,3 % za svaku narednu grupu invalidnosti do I grupe	
5.	Lica u statusu demobilisanog branioca kao i njegovi supružnici i djeca: za 1 godinu učešća 10 % + 0,1% za svaki mjesec učešća branioca u Oružanim snagama	11,2 % - 15,5 %
6.	Dobitnici ratnog priznanja i odlikovanja I grupe kao i njegovi supružnici i djeca: dodatno (na osnovu statusa iz prethodnih tačaka)	3 %
7.	Dobitnici ratnog priznanja i odlikovanja II grupe kao i njegovi supružnici i djeca: dodatno (na osnovu statusa iz prethodnih tačaka)	2 %
8.	Dobitnici ratnog priznanja i odlikovanja III grupe kao i njegovi supružnici i djeca: dodatno (na osnovu statusa iz prethodnih tačaka)	1 %
9.	Lica u statusu maloljetnih branilaca: dodatno (na osnovu statusa iz prethodnih tačaka)	3%
10.	Djeca umrlog ratnog vojnog invalida i demobilisanog branioca dodatno na osnovu statusa umrlog roditelja (na osnovu statusa iz prethodnih tačaka).	1%

(2) Ukoliko oba roditelja imaju status lica iz člana 3. ove Uredbe vrednuje se prioritet koji je povoljniji za korisnika prava.

(3) U slučajevima kada se primjenom prioriteta iz stava (1) ovog člana za dva ili više lica utvrdi jednak broj bodova, imaju se primijeniti prioriteti na osnovu reda kategorija pobrojanih u stavu (1) ovog člana.

POGLAVLJE III. PRELAZNE I ZAVRŠNE ODREDBE

Član 6.

(Nadzor nad primjenom ove Uredbe)

Upravni nadzor nad primjenom ove Uredbe vrši Upravna inspekcija Ministarstva pravosuđa, uprave i lokalne samouprave Hercegovačko-neretvanskog kantona ukoliko se radi o kantonalnim organima uprave, kantonalnim upravnim organizacijama, jedinicama lokalne samouprave i Ministarstvo zdravstva rada i socijalne zaštite – Inspekcija rada ukoliko se radi o pravnim licima čiji je osnivač Kanton, jedinica lokalne samouprave, odnosno koje se finansiraju iz Budžeta sa učešćem od najmanje 25%.

Član 7.

(Novčane kazne)

Zbog nepoštivanja ove Uredbe kaznit će se za prekršaj odgovorno lice u pravnom licu iz člana 1. stav (2) ove Uredbe novčanom kaznom do 5.000,00 KM, te pravno lice iz člana 1. stav (2) ove Uredbe novčanom kaznom do 10.000,00 KM, u skladu sa važećim zakonom.

Član 8.

(Prelazne i završne odredbe)

(1) Pravna lica iz člana 1. ove Uredbe u roku od 60 dana od dana stupanja na snagu Uredbe dužna su **u općim aktima kojima se reguliše zapošljavanje** propisati primjenu kriterija i vrednovanja iz ove Uredbe, te se do usklađivanja njihovih općih akata ista neposredno primjenjuje.

(2) Ova Uredba primjenjuje se na postupke zapošljavanja u pravnim licima iz člana 1. ove Uredbe koji na dan stupanja na snagu Uredbe nisu okončani.

(3) U roku od 15 dana od dana stupanja na snagu ove Uredbe, ministar za pitanja boraca u Hercegovačko-neretvanskom kantonu donijet će propis o primjeni članova 3., 4. i 5. Uredbe.

Član 9.

(Stupanje na snagu)

Uredba stupa na snagu osmog dana od dana objavljivanja u „Službenim novinama Hercegovačko-neretvanskog kantona“.

Prilog 1.

POPIS DOKUMENTACIJE KOJOM SE DOKAZUJE ISPUNJAVANJE USLOVA ZA KORIŠTENJE PRAVA IZ OVE UREDBE

(1) Dokaz o statusu lica iz člana 3. Uredbe:

a) Dokazivanje učešća u Oružanim snagama za demobilisanog branioca (člana porodice demobilisanog branioca i umrlog demobilisanog branioca) utvrđuje se na osnovu:

- Uvjerenja koje izdaje nadležna općinska Grupa za pitanja evidencija iz oblasti vojne obaveze, izdato nakon objave Javnog poziva;

b) Dokaz za člana porodice poginulog branioca, ratnog vojnog invalida (člana porodice ratnog vojnog invalida i umrlog ratnog vojnog invalida) i dobitnika ratnog priznanja i odlikovanja (člana porodice dobitnika ratnog priznanja i odlikovanja i umrlog dobitnika ratnog priznanja i odlikovanja) utvrđuje se na osnovu:

- Uvjerenja koje izdaje nadležna općinska Služba za boračko-invalidsku zaštitu prema mjestu prebivališta, izdato nakon objave Javnog poziva;

(2) Dokaz o srodstvu sa licem iz člana 3. stav (2) Uredbe:

a) Dokazi za djecu:

- Izvod iz matične knjige rođenih i Izvod iz matične knjige umrlih (ako se radi o poginulom ili umrlom roditelju);

b) Dokazi za supružnike:

- Izvod iz matične knjige vjenčanih i Izvod iz matične knjige umrlih (ako se radi o poginulom ili umrlom supružniku);

(3) Dokaz o prebivalištu korisnika prava:

- Uvjerenje o kretanju korisnika prava – kao dokaz o prebivalištu (PBA - 4A obrazac) koji izdaje MUP HNK, izdato nakon objave Javnog poziva;

(4) Dokaz da korisnik prava nije bio zaposlen na neodređeno vrijeme u stečenoj stručnoj spremi:

a) Za lica koja nisu bila u radnom odnosu:

- Potvrdu Federalnog zavoda MIO/PIO da se ista ne nalaze u bazi podataka matične evidencije aktivnih osiguranika kod Federalnog zavoda MIO/PIO, izdatu nakon objave Javnog poziva;

b) Za lica koja su bila ili su u radnom odnosu:

- Potvrdu Federalnog zavoda MIO/PIO (AM obrazac) izdatu nakon objave Javnog poziva i Uvjerenja/Potvrde svih poslodavaca kod kojih je korisnik prava imao/ima zasnovan radni odnos, sa jasno naznačenom dužinom trajanja ugovora (određeno/neodređeno vrijeme) i naznakom stepena stručne spremlje sa kojom je radnik zasnovao radni odnos kod poslodavca;

- Ako neki od prethodnih poslodavaca više ne postoji ili objektivno nije moguće pribaviti navedena Uvjerenja/Potvrde, kandidat je, uz navedenu Potvrdu Federalnog zavoda MIO/PIO (AM obrazac), dužan dostaviti Izjavu u kojoj će biti navedeno da pod punom materijalnom i krivičnom odgovornošću izjavljuje da prethodni poslodavac više ne postoji ili kojom navodi činjenice zbog kojih nije u mogućnosti pribaviti tražena Uvjerenja/Potvrde, ovjerena nakon objave Javnog poziva.

Bosna i Hercegovina

Federacija Bosne i Hercegovine

HERCEGOVAČKO-NERETVANSKI KANTON

VLADA

Broj: 01-1-02-548/26

Mostar, 31.03.2026.godine

PREDSJEDNICA

Marija Buhač,s.r.